

Broj: 09-14-6-8850-22/17  
Sarajevo, 04.03.2019. godine

Na osnovu člana 70. st. (1) i (3) Zakona o javnim nabavkama („Službeni glasnik BiH“, broj: 39/14), a na prijedlog Komisije za javne nabavke, imenovane Rješenjem, broj: 03-05-1-1669/18 od 13.03.2018. godine i broj: 03-05-1-1669-2/18 od 11.07.2018. godine, federalna ministrica financija/finansija **d o n o s i**

**ODLUKU**  
**o izboru najpovoljnijeg ponuđača za nabavku roba – software za evidenciju**  
**za potrebe Federalnog ministarstva financija/finansija**  
**(ponovljeni postupak)**

**I**

U cilju odabira najpovoljnijeg ponuđača, nakon provedenog otvorenog postupka javne nabavke roba – software za evidenciju (ponovljeni postupak) za potrebe Federalnog ministarstva financija/finansija, evidencijski broj nabavke: 09-14-6-8850-1/17, broj obavještenja o nabavci sa portala javnih nabavki: 810-1-1-3-3-1/18 od 15.02.2018. godine, sažetak obavještenja objavljen u „Službenom glasniku BiH – Oglasnik javne nabavke“, broj: 13/18, kao najbolje ocijenjena ponuda je ponuda ponuđača:

**KING ICT d.o.o. Sarajevo sa ukupnom cijenom ponude u iznosu 348.300,00 KM bez PDV - a.**

**II**

Ponuda ponuđača iz tačke I ove odluke ocijenjena je prihvatljivom, jer ispunjava sve uvjete postavljene tenderskom dokumentacijom.

**III**

Za realizaciju ove odluke zadužuje se Sektor za ekonomske, finansijske i zajedničke poslove ovog Ministarstva.

**IV**

Odluka stupa na snagu danom donošenja i objavit će se na web stranici Federalnog ministarstva financija/finansija, u skladu sa članom 70. stav (6) Zakona o javnim nabavkama, istovremeno s upućivanjem iste svim ponuđačima koji su učestvovali u predmetnom postupku javne nabavke.

## Obrazloženje

Postupak nabavke pokrenut je Odlukom o pokretanju postupka, broj: 09-14-6-8850/17 od 22.12.2017. godine. Javna nabavka provedena je putem otvorenog postupka nabavke. Procijenjena vrijednost nabavke iznosila je 350.000,00 KM bez PDV-a i predviđena je Planom javnih nabavki za 2017. godinu Ministarstva – Izmijenjeni Plan, dio I Robe, pod rednim brojem 6. – software za evidenciju. Obavještenje o nabavci, broj: 810-1-1-3-3-1/18 poslano je na objavu 15.02.2018. godine, te je zajedno sa tenderskom dokumentacijom istog dana objavljeno na portalu javnih nabavki. Sažetak obavještenja objavljen je u „Službenom glasniku BiH – Oglasnik javne nabavke“, broj: 13/18.

Tri ponuđača dostavila su ponude u predmetnom postupku nabavke. Ponude su dostavljene blagovremeno od strane ponuđača: AVACOM GROUP d.o.o. Mostar, QSS d.o.o. Sarajevo i KING ICT d.o.o. Sarajevo.

Komisija za javne nabavke, imenovana Rješenjem, broj: 03-05-1-1182/17 od 20.02.2017. godine, izvršila je pregled i evaluaciju pristiglih ponuda, konstatovala da su sve ponude prihvatljive i dostavila federalnoj ministrici Zapisnik o pregledu i ocjeni ponuda, broj: 09-14-6-8850-9/17 od 23.04.2018. godine zajedno sa Preporukom da se donese Odluka o izboru najpovoljnijeg ponuđača. Na osnovu Preporuke Komisije, donešena je Odluka o izboru najpovoljnijeg ponuđača, broj: 09-14-6-8850-13/17 od 25.04.2018. godine, kojom je kao najpovoljniji ponuđač izabran AVACOM GROUP d.o.o. Mostar.

U žalbenom roku, na predmetnu Odluku izjavljena je žalba ponuđača KING ICT d.o.o. Sarajevo. Postupajući u drugostepenom upravnom postupku, Ured za razmatranje žalbi Bosne i Hercegovine, rješavajući po predmetnoj žalbi donio je Rješenje, broj: JN2-03-07-1-682-11/18 od 21.06.2018. godine, kojim je žalbu žalitelja KING ICT d.o.o. Sarajevo usvojio, poništio Odluku o izboru najpovoljnijeg ponuđača, broj: 09-14-6-8850-13/17 od 25.04.2018. godine i predmet vratio ugovornom organu na ponovni postupak odnosno ponovnu evaluaciju ponuda.

Postupajući po uputama na osnovu Rješenja Ureda, Komisija imenovana Rješenjem, broj: 03-05-1-1669/18 od 13.03.2018. godine i broj: 03-05-1-1669-2/18 od 11.07.2018. godine izvršila je ponovnu evaluaciju ponuda i konstatovala da su ponude ponuđača AVACOM GROUP d.o.o. Mostar i KING ICT d.o.o. Sarajevo prihvatljive, a da se ponuda ponuđača QSS d.o.o. Sarajevo odbacuje kao neprihvatljiva.

Dana 14.09.2018. godine Komisija je pripremila i poslala Zahtjev za produženje opcije ponuda ponuđačima u postupku i Zahtjev za pojašnjenje dokumentacije, prema uputama Ureda za razmatranje žalbi BiH. Nakon što je Komisija dobila odgovore na Zahtjeve pristupila je ponovnoj evaluaciji ponuda. Zatim je Komisija zatražila od Agencije za javne nabavke BiH ponovno zakazivanje e-aukcije. Nakon održane e-aukcije Komisija je dana 14.11.2018. sačinila Zapisnik o pregledu i ocjeni ponuda kao i Odluku o izboru najpovoljnijeg ponuđača dana 19.11.2018. godine.

Ponuđač KING ICT d.o.o. Sarajevo je dana 03.12.2018. godine ugovornom organu dostavio Žalbu na Odluku o izboru najpovoljnijeg ponuđača te je Žalba s Izjašnjenjem proslijeđena Uredu za razmatranje žalbi Bosne i Hercegovine. Postupajući u drugostepenom upravnom postupku, Ured za razmatranje žalbi Bosne i Hercegovine, rješavajući po predmetnoj žalbi donio je Rješenje, broj: JN2-03-07-1-1685-10/18 od 17.01.2019. godine, kojim je žalbu žalitelja KING ICT d.o.o. Sarajevo usvojio, poništio Odluku o izboru najpovoljnijeg ponuđača, broj: 09-14-6-8850-15/17 od 19.11.2018. godine i predmet vratio ugovornom organu na ponovni postupak odnosno ponovnu evaluaciju ponuda.

Postupajući po uputama na osnovu Rješenja Ureda, Komisija imenovana Rješenjem, broj: 03-05-1-1669/18 od 13.03.2018. godine i broj: 03-05-1-1669-2/18 od 11.07.2018. godine izvršila je ponovnu evaluaciju ponuda. U ponovnom postupku pregleda i ocjene ponuda, zatraženo je od ponuđača da produže opcije ponude i garancije za ozbiljnost ponude, sa rokom važenja 120 dana. Produženje opcije ponude i garancije za ozbiljnost ponude dostavili su ponuđači: Avacom Group d.o.o. Mostar i KING ICT d.o.o. Sarajevo, te su time ispunili uslov da dostavljene ponude mogu biti predmet ponovnog pregleda i ocjene istih. Ponuđač QSS d.o.o. Sarajevo nije produžio opciju ponude, tako da ponuda ovog ponuđača nije dalje ni razmatrana.

Prilikom ocjene ponuda, Komisija je konstatovala da je ponuda ponuđača KING ICT d.o.o. Sarajevo prihvatljiva, a da se ponuda ponuđača AVACOM GROUP d.o.o. Mostar odbacuje kao neprihvatljiva.

Ponuda ponuđača AVACOM GROUP d.o.o. Mostar Bleiburških žrtava 17c Mostar, ID broj: 4227150030004, odbacuje se kao neprihvatljiva iz sljedećeg razloga: U tenderskoj dokumentaciji, Ugovorni organ je u smislu tehničke i profesionalne sposobnosti ponuđača, između ostalog, propisao sljedeći uvjet:

- Dodatni zahtjevi za softver za evidenciju (str. 65 tenderske dokumentacije) „Ponuđeno softversko rješenje ne smije biti uslovljeno brojem korisnika aplikacije, broj korisnika može biti neograničen, niti količinom podataka koja će biti smještena u bazi u smislu zahtjeva za dodatnim licencama ili troškovima proširenja baze podataka.“ Ponovnim uvidom u ponudu ponuđača, na što je posebno ukazao Ured u predmetnom Rješenju, Komisija je utvrdila da se u sklopu Ponude ponuđača u Obrascu za cijenu ponude nalazi proizvod Microsoft corporation SQL CAL 2017 Government (korisničke). Žalitelj KING ICT d.o.o. zatražio je mišljenje od strane Microsoft BiH, te je dobio odgovor kojim se potvrđuje da ovaj model ograničava broj korisnika ili uređaja koji pristupaju bazi podataka. Imajući u vidu naprijed navedeno, Komisija je ponovnim pregledom ponude ponuđača, konstatovala da isti nije ispunio uvjete u dijelu koji se odnose na tehničku i profesionalnu sposobnost ponuđača, na način kako je zahtijevano tenderskom dokumentacijom, te je ponudu ponuđača AVACOM GROUP d.o.o. Mostar odbacila kao neprihvatljivu.

U postupku donošenja ove odluke, posebno su cijenjene činjenice, da je Komisija pravilno i potpuno, izvršila ocjenu kvalificiranosti ponuđača, te ocjenu prispjelih ponuda, shodno postavljenim uvjetima iz tenderske dokumentacije.

U postupku ocjene provedenog postupka, federalna ministrica nije našla razloge, nepravilnost niti propuste u radu, koji bi eventualno bili osnov za neprihvatanje preporuke Komisije za javne nabavke.

Naime, u postupku je ocijenjeno da je Komisija u svemu pravilno postupila, te da je izbor izvršen u skladu sa Zakonom o javnim nabavkama, podzakonskim aktima i tenderskom dokumentacijom.

Izabrani ponuđač dostavio je prihvatljivu ponudu u skladu sa uvjetima postavljenim u tenderskoj dokumentaciji.

Uzimajući u obzir naprijed navedeno, odlučeno je kao u dispozitivu ove odluke.

#### **POUKA O PRAVNOM LIJEKU:**

Protiv ove odluke, svaki ponuđač koji je učestvovao u postupku nabavke, može izjaviti žalbu Uredu za razmatranje žalbi putem ugovornog organa - Federalnog ministarstva financija/finansija, u pisanoj formi direktno, elektronskim putem ili preporučenom poštanskom pošiljkom, u roku od 10 (deset) dana od dana prijema ove odluke. Žalba se podnosi u najmanje 3 (tri) primjerka.

MINISTRICA  
Jelka Miličević



Dostaviti:

1. Ponuđačima u postupku
2. U dokumentaciju Komisije
3. Sektoru za ekonomske, finansijske i zajedničke poslove Ministarstva
4. a/a